

10. marts 2026

UPA 2026/69

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Peqqinnissaqarfimmi sulisut naleqquttumik ilinniaqqissimasut peqqinnissaqarfiup qanoq pigiinnarnerusinnaanera, ataqatigiittumillu qanoq atorsinnaanera pillugit nassuiaasiornissaannik, tassungalu atasumk iliuusissatut pilersaarusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pipaluk Olsen, Demokraatit)

Tunngavilersuut

Nunatsinni peqqinnissaqarfik siullertut inunnit aallaaveqarpoq. Paasisimasaqarnermik, akisussaaffeqarnermik, pimoorussinermillu.

Peqqinnissamut tunngasutigut sullissisut ilinniaqqinnissaannut ukiut tamaasa annertuumik aningaasaliissuteqartarpugut. Matumani sullitanik naapitsinerup pitsaassusaanik annertuusaallutik soorlu eqqarsartaatsimikkut aamma inooqataanermikkut assigiinngitsunik ajornartorsiuteqartunut tapersersuinerup, ilaqutariinnut ilitersuinerup, ajoqusernermit kingunerlutitsinermut katsorsaanerup, immikkullu suliaqarfiit allat iluini ilinniaqqinnerit. Kisianni unammillernartitaqarpugut.

Ullumikkut sulisut naleqquttumik ilinniaqqissimasut peqqinnissaqarfimmi suliunnaartartut imaluunniit piginnaasatik nutaat sulinerminni atornissaannut killilimmik periarfissaqartartut takusarparput. Piginnaasanik atuinissami sumiiffinni pingaarnersiunerit, aqutisullu aalajangiineri apeqqutaasorujussuusarput. Imaappoq, ataatsimoortumik aamma periusissioortumik siunnerfeqarnissaq amigaataavoq. Tamanna ataannarsinnaanngilaq.

Ilinniaqqinnerit aningaasatigut, inunnullu aningaasaliinerupput. Peqqinnissamut tunngasutigut sulisugut piginnaanngorsassallugit inuiaqatigiittut salliukkutigu, piginnaasat taakkua peqqinnissaqarfimmik ataqatigiittumik, siunnerfilimmillu atorneqarnissaat qulakkiissallugu politikkikkut aamma pisussaaffigaarput.

Demokraatit isumaqarput, pitsaanerusumik tamat isiginnissuteqarnissamut, ersarissumillu siunnerfeqarnissamut piffissanngortoq.

Sulisut kiffaanngissuseralugu toqqaanissaannik killiliinissamik siunnersuut tunngassuteqanngilaq. Naamerluinnaq. Ilinniaqqinneq suliatigut ineriartornermik, akisussaaffeqarnermik, atuuffinnillu kinguneqarluni peqqinnissaqarfiup suliffeqarfittut pilerinarsarnerunissaanut, taamaalillunilu sulisut



pigiinnarnerunissaannut tunngassuteqarpoq.

Immikkut piginnaasanik atuinerulerneq napparsimasunik sullissinermut aamma pitsanngorsaataasinnaassaaq, siusissumik iliuuseqarnissaq qulakkeerneqarsinnaassaaq, katsorsaanermilu ataqatigiissitsinerunissamik pilersitsisoqarsinnaassalluni. Minnerunngitsumik suliaqarfinni innuttaasut peqqissutsikkut kiisalu eqqarsartaatsimikkut, inooqataanermikkullu assigiinngitsunik ajornartorsiuteqarlutik tapersersorneqarnissaminnik pisariaqartitsisuni.

Peqqinnissaqarfik nukittoq, piujuartussarlu kissaatigigutsigu piginnaasat aningaasaliiffigeriikkatta atornissaannut, pigiinnarnissaannullu pikkorinnerusariaqarpugut.

Neriuppugut siunnersuut Naalakkersuisunit, maanilu Inatsisartuni partiinit tapersersorneqassasoq.

Pisortanut aningaasatigut allaffissornikkullu kingunerisassai

Nassuiaasiornermut atatillugu aningaasartuuteqassaaq. Taakkua ilinniagartuut ukiumut sulinerat 500.000 koruuniusut qaangissanngikkaat naatsorsuutigineqarpoq.

Namminersortunut aningaasatigut allaffissornikkullu kingunerisassai

Nassuiaasiornermut atatillugu kingunissaqanngilaq.

Innuttaasunut aningaasatigut allaffissornikkullu kingunerisassai

Nassuiaasiornermut atatillugu kingunissaqanngilaq.